

Apününtuaitkat Karaloukta nütüma JUAN

¹ Taya, chi laülaakai napüleerua na anou-jashiikana nünain Jesucristo sulu'u tü outka-jaaleekat yaaya, tashajüin joolu'u pümüin tawala Gayo, pia aishikai tapüla saa'u pünoujain tü shiimüinkat wanaa tamaa. ² Tawalachee, tatüjaa aa'ulu sünain talatüin Maleiwa pümaa. Kasa-taalejese ayatüin lotüin pia sünain anoujaa otta sünain nnojolin ayuulin pia. ³ Talatüsü ma'i taa'in taapaiwa'aya püchiki aküjünakat tamüin natüma wane wawalayuu ale'ejakana yaamüin chajee püma'anajee. Naküjain püchiki tamüin sünain pünoujain tü shiimüinkat waneepia otta sünain paa'inrüin tü nüchekakat chi Malei-wakai püpüleerua süka pütüjaain saa'u sünain shiimüin tü nümakat pümüin. ⁴ Talataleesia ma'i taa'in taapapa nachiki na tachooinkana, na takaaliijalakana sünain tü nanoulakat, sünain noonoin waneepia sümaa tü shiimüinkat eki-rajünakat anain naya, maa aka paa'inrüin pi-aka'iya.

⁵ Tawalachee, tatüjaa aa'uchi pia sünain kamaneein waneepia namüin na wawalayuukana eekai nantapünaain pünainmüin, mayaashiije nnojoliin pi'raajüin. ⁶ Je nale'ejapa chajee na wawalayuukana yaamüin, naküjain püchiki sümüin tü

a'waajüsükalüirua Maleiwa yaaya sünnain pii'iyatüin namüin sünnain alin ma'i naya püpüla. Je nale'ejapeena pünainmüin so'uweena wane ka'i sünnain pi'iyuin naya, tatüjaa aa'uchi pia sünnain pükaaliijainjanain naya nachikua süpüla na'yataain nümün Maleiwa. ⁷ Sünnain no'unüin nepialu'ujee süpüla aküjaa nüchiki chi O'tte'erüikai, nnojoliishii achuntüin sümün tü manoujainsatkalüirua tü kasa che'ojaakat namün süpüla o'unaa. ⁸ Je sükajee tia, anashi müleka ayatüle pia sünnain kamaneein namün na puwalayuu eekai nantapünaain pünainmüin sünnain a'yatawaa nümün chi Senyotkai, süpüla wanaawajiraainjatün paa'in waneepia namaa sünnain ekirajaa tü shiimüinkat.

⁹ Tü taluwataakat anain sulu'u tü karaloukta tashajakat paala jümün jia a'waajüshiikana Maleiwa cha'aya, ayouktünüsü nütüma chi wayuu ja'akakai, Diótrefeskai anülia. Nnojoliishii jamajanain waya nümün, süka nüchekün sülateein nujut puulia sünnain laülawaa jüpüleerua jia anoujashiikana jüpüshua. ¹⁰ Je müleka to'unule jünainmün, taashajaweerü achiki jümaa tü naa'inrakat sünnain niperulajün waya sümaa ni'rülin wayumün wamün. Nnojotsü shiain ne'e sümüiwa tü kasa mojusü naa'inrakat. Mamaneesai nia namün na wawalayuu aküjülüikana nüchiki chi O'tte'erüikai, na chapünaakana jünainmün. Je na wayuukana ja'aka eekai kamaneein namün na antakana jünainmün, achiajaanüshii naya nütüma sümaa najütünün nütüma sulu'ujee tü

outkajaaleekat.

¹¹⁻¹² Taluwataain joolu'u pünainmüin wane wawala kanüliashi Demetrio. Kojutshi nia sütüma tü anoujasükalüirua sainküin mmakat süpüshua, sünain “Anashi ma'i nia süka nikirajüin waya waneepia sünain tü shiimüinkat” sünain maa nümün. Akaajaa wanüiki wayakana yaaje'ewaliikana nüchikiya. Je pütüjaa aa'ulu sünain shiimüin süpüshua tü waküjakat pümün. Tawalachee, nnojo püshatüin tü kasa mojusü saa'inrakat tü wayuukolüirua eekai müin aka naa'in Diótfrefes. Shia anaka alu'u müleka püshatüle tü kasa anasü saa'inrakat wayuu eekai müin aka naa'in Demetrio. Chi wayuu eekai naa'inrüin waneepia tü anasükat, nüchon Maleiwa nia. Otta chi eekai naa'inrüin waneepia tü mojusükat, nnojoishi ni'raajüin Maleiwa süka nnojolin nüchoin.

¹³ Kettaasü tü tashajüinjatkat joolu'u pümün sulu'u tü karalouktakat, ja'itairü isain wainma tü tashajeekat pümün. ¹⁴ Kasataalejese tountüin to'unüin pünainmüin maalü süpüla taashajaain-jachin pümaa pümülatu'u.

¹⁵ Tachuntüin joolu'u nümün Maleiwa paa'u süpüla naapüinjachin wane anaa pümün. Asakitshii pünain na puwalayuukana yaaya. “Asakitshii jünain”, pümawalai namün na wawalayuukana cha'aya wane'ewaïre nakua.

**Tü nüchikimaajatkat Jesucristo
Wayuu: Tü nüchikimaajatkat Jesucristo New
Testament**

copyright © 2010 Wycliffe Bible Translators, Inc.

Language: Wayuu

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dcbb0234-8491-58d2-b1da-acba92db0647